

25. maj

Meeqqani inuusuttunilu hashimik imigassamillu atornerluinerup qanoq pitsaanerpaamik pinaveersimatinnissaanut akiornissaanullu oqallisissiaq aallaavigalugu oqalinnissamut siunnersuut.

(Inatsisartuni ilaasortat, Naaja H. Nathanielsen, Attaviitsoq aamma Agathe Fontain, Inuit Ataqatigiit)

Naaja H. Nathanielsen, Attaviitsoq aamma Agathe Fontain, Inuit Ataqatigiit oqallisissiaannut imartuumut Siumumiit imak oqaaseqassaagut.

Siumup anguniarpaa meeqqanik inuusuttunillu qiimasunik toqqissisimasumillu peroriartortitsinisaq. Isumassuineq susassareqatigiinnerlu inuiaqatigiinni toqqammavittut inisseqqinneqarnissaannut innuttaasugut tamatta peqataanissarput Siumup kaammattuutigaa.

Meeqqat timikkut inuunerminnilu peqqissut Siumut ineriartortikkumallugit soqutigisariuaannarpai. Inuunerissuineq tassaasooq avatangiisit meeqqamut inuusuttumullu naleqassusermik misigilersit-siviusut. Toqqaviliisoq inuunermik pingaartitsinermik, sulerusunnermik, ilikkagaqarusunnermik, siunissamullu pitsaasumik takorluuilersitsinermik.

Oqallisissiaq ilisarnarpoq, ullumikkut sineriatsinni tamani ikiaroorntoq imigassarlu meeqqanut allaat atugaalnera inuiaqatigiinnut alianartuuvoq ilungersuumminarlunilu. Sakkortuvoq anni-laarnarlunilu. Inersimasutut ilisimavarput avatangiisinip meeqqat qanoq sakkortutigisumik sunner-sinnaasarai. Meeqqammi nuannaartorisaaqartarput, inooqataaffigisatillu ilaarlugit inuuneqalertar-nerat takornartaagunangilaq. Meeraq inunngorneq ajorpoq ajortussamik uummammioqareerluni. Inersimasuusugut meeqqagut qanoq inuunissaannik maligassiuuttarpagut.

Meeqqat pissanganartorsiorneq nuannarisarpat. Misileraanerit ilaatigut ulorianartut, qanoq kingu-neqarsinnaaneri annerusumik eqqarsaatigineq ajorpat. Angerlarsimaffik qanoq ittuunera anner-tuumik nipilersoqataasarpoq. Imaangilarli tamatigut taamaattuaannartoq. Ikinngutit suunniinertat ilaanniipput. Eqqumaffiginngikkaannilu kipusortitsisinnaasarnertat pisartunut ilaapput. Taamaat-tumik angajoqqaat kaammattussuagut meeqqatik qanoq inuunerannik malinnaavigilluartaqqullugit.

Ikiaroorntoq akuerinngilarput naak atuisut oqartaraluartut ulorianartutut nalilersorneqassanngitsoq pujortatagaannaammangooq. Imaluunniit ataasialinngillat oqaluttut nakorsaatitunngooq atoramik-ku pitsaaquteqartoq. Kisianni ajornerpaavoq qanoq kingunipilui sakkortutigisinnaanersut nassueru-tigiumaneqarneq ajormata. Ukiuni kingullerni alianartuuvoq inuusuttutsiarsuit A1-miittariaqalersut takusalerlugit. Inuunerup pilluarnassusia qimassimallugu immikkut ikiorneqartariaqalersimallutik nakorsartariaqalersimasut. Siunissami aggersumi tamakku amerligaluttuinnarnissaat aarlerinartut annersaraat. Utoqqartatsinniit sulii ikiortariaqalissusii annertuneruleriaannaavoq.

Taamaattoqassappallu utoqqarnut nukkiit tunniukkumasagut qanoq ililluta nammassavagut? Oqaan-narsinnaangilugut taamaattussaasimagami taamaattoq. Naamerluinnaq, taamaattussaangilaq akuersaangilluinnarparput tamatuma attanneqarnissaa. Partiit akimorluta inuiaqatigiit peqatigalugit

kivitseqatigiittariaqarpugut. Meeqqat siunissaralugit oqalutsilluta nukiit tamaasa atorfissaqartippagut.

Meeraq 18-nik ukioqalernissami tungaanut meeraavoq. Akisussaaffillu angajoqqaaniippoq. Angajoqqaat akisussaaffimmik arsaarneqartuassappata taava suut pisussaaffigilissavai?

Pisussaaffiuvoq perorsaaniisaaq, pisussaaffiuvoq maligassiuiinissaaq, pisussaaffiuvorlu asanninnermik tunisinissaaq. Meeraq atuilersimappat inatsisineereerpoq meeqqap inuuneranik illersuinissamut malitassaaq:

“Meeqqanik inuusuttunillu ikiorsiisarneq pillugu Inatsisartut peqqussutaat nr. 1, 15. april 2003-meersoq §5 imm.2”.

Qaammarsaaneq ilumini pitsaagaluartoq amigarporli siammarterneqanngikkuni. Atuarfeqarfanni immikkut atuartsissutigineqartariaqarpoq. Qanga kalaallit susassareqatigiinnerup aqqani meerartatik qanoq pinissaannik siunnersortarpaat peqataatillugillu. Ileqqoq tammatsaalisassarput tamatta nukittoqqutitut atortariaqarparput. Atuarfanni immikkut kommunemut attuumasumik socialrådgiverareqartariaqarpoq. Ilumoorinnaanngilaq oqalutsilluta meeqqagut siunissarigigut immikkut pilliuteqassanngikkutta. Meeqqat maanna pineqartut illit uangalu utoqqaligutta isumalluutissaraagut, taakkuupput uatsinnut isumaginnittussat.

Sumiginnaaneq oqaaseq tamatsinnut annernartuuvoq sakkortullunilu. Meeraq atuisuusimaguni immikkut katsorsartariaqartoq pinngitsoorani angajoqqaatut akisussaasoq peqataatinneqartariaqarpoq. Angajoqqaarli atuisutut ilisimaneqarpat aalajangiisinneqarsinnaanngilaq meeraq qanoq sulissutigineqarnissaa pillugu. Uani pisortat akuleruttussaapput. Meeraq arsatut tammiseqattaakkatut pineqartussaannngimmat. Meerarmi illernartuutitta pingaarnersaanniittariaqarpoq. Illersussagutsigu pissusissamisunnginnerpa ajornartorsiortoq iternga tikillugu ikiussallugu?

Meeqqap atuisunngornerannut aqquataajuaannarput inersimasut. Taakku aqqudigeqqaartinnagit ikiaroorartoq imigassarluunniit meeqqap nammineerluni pissarsiarisinnaanngilaa. Qanortoq eqqarsalerniarillik iliuutitik nalummassuk. Imigassap ikiaroorartulluunniit aqqudugalugit inuunerissaarnermik tikkuussinaviannngimmata. Nunat saniligut isumassarsiorfigisinnaasariaqarpagut, sutigut ilu-aqutaasunik aallerfigisinnaanerigut, qanoq periuuseqarluta akiuiniarneq eqqortoq atorsinnaavarput?

Sakkortuumik immitsinnut piuffigisariaqarpugut, iliuuseqartariaqarpugut oqaluuserisariaqarpagullu qanoq pitsaanerpaamik aqqissuisariaqarluta. Qassiillimi ilaqutariit meerartai ikiorneqanngitsoorlutik sequmittarpat? Qassiillimi takuneqanngitsoorlutik inersimasunngorsimappat? Tamanna allannortittariaqarparput.

Qujanaq.

Laura Táunâjik
Siumut